

110 年全國語文競賽客家語朗讀文章國中學生組（四縣腔）

編號 1 號

【路燈著咧】林伯殷原作

臨暗邊仔，天還昏暗，屋脣个路燈就著也，係無同佢看較真兜仔，頭下碼¹還正經毋知路燈既經著哩，一直愛等到天大暗，路燈个電火緊來緊光，正確確實實知講自家屋脣个路燈有著也！在暗晡頭，這支路燈膠吾屋脣个大路箭到²光光，同出出入入个人車都照到清清楚楚。逐日食飽夜，鄰舍會企在路燈下打嘴鼓，共下等垃圾車來；熱天時節，屋肚較熱，路燈下自然又變成大家奈涼、散步个所在；等到寒天，路燈又像係一蕊光明燈，就像係企在該等等同人講：「看著佢，燒暖个屋下就到咧！」

臨天光仔，路燈就起勢定定仔行下戲棚，天越光，路燈火就越看毋著，最尾，連幾時烏忒个也無人知。路燈盡知進退，完全毋會去同日頭搶光³，日時頭，路燈就在該恬恬等，等到夜來个時節就做得好好發揮哩！

斷烏咧，路燈準時來上棚⁴！膠負責个所在照到光光光，久

咧，人嘎分路燈縱壞，毋記得佢逐夜就恁認分、恁煞猛，一直愛到有一暗晡，發現著原本愛光个地方還暗暗，正會知路燈原來有恁好！想起吾个老屋，暗晡頭屋脣滿哪仔暗摸叮咚⁵，係無擎火⁶，根本就行無路，毋使想出半步門，毋過，就算有擎火行路，該細粒電珠仔⁷發出弱弱个光，照得路來，驚頭那頂有螞蟻絲；照得頭那頂來，又驚蛇哥隨時會對路脣弄出來⁸，毋管自家仰般細心細意，心肝肚還係會驚驚險險⁹，哪當得¹⁰這下个路燈火，分人恁安心、恁自在！

一支路燈，照光个地方盡有限，毋過，路燈係一支一支仔連起來，該就做得照亮一隻莊頭、一條街路、一座都市，路燈毋單淨照亮一隻地方，也減少咧日膠夜个爭差¹¹，改變咧人个生活，都市肚个公園，暗晡頭還有人在該練氣功、跳舞同運動，大路也還有人行路、騎自行車，係無路燈，敢有可能？

暗也，路燈又著咧！佢知路燈會同當多暗暗个地方照到光光，分人方便上下、分人做得安心，佢也知有當多人同路燈共樣，恬恬在該照亮佢个社會。

¹ 頭下碼：音 teu^ˇ ha ma^ˊ；剛開始的時候。

² 箭到：音 jien do；直射至。

³ 搶光：音 qiong^ˋ gong^ˊ；爭著出風頭。

⁴ 上棚：音 song^ˊ pang^ˇ；上場了。

⁵ 暗摸叮咚：音 am mo^ˊ din^ˊ dung^ˊ；天色或環境暗得看不見的樣子，形容一片漆黑。

⁶ 擎火：音 kia^ˋ fo^ˋ；拿著手電筒。

⁷ 電珠仔：音 tien zu^ˊ e^ˋ；燈泡。

⁸ 弄出來：音 nung cud^ˋ loi^ˇ；鑽出來。

⁹ 驚驚險險：音 giang^ˊ giang^ˊ hiam^ˋ hiam^ˋ；感到驚險可怕的樣子。

¹⁰ 哪當得：音 nai dong ded^ˋ；怎麼比得過。

¹¹ 爭差：音 zang^ˊ ca^ˊ；差別。

【學泅水】徐姿華原作

佢一旦就當驚水，小學一年生該下，先生鼓勵大家學泅水，講泅水係當好個運動，身邊個好同學做下學會泅水哩，硬性個佢乜毋願輸人，轉去屋下就緊嚟¹阿媽講愛去學泅水。趕等暑假，阿媽同佢尋著一間溫水個游泳池，還問著名聲盡好個教練來教佢，過買一身靚靚個連身游泳衫分佢，鼓勵佢勇敢學泅水。

第一到去到游泳池，又驚又好。做好軟身運動，教練帶佢同另外四個學生仔練習沒水、學換氣，同佢兜一個一個拗入游泳池。佢兜乖乖聽教練個指示，同頭那沉²入水裡肚，佢嚇到胚命仔扳等游泳池脣、腳趔趔仔毋敢沾著水、抽骸另命、噉到目流鼻涕，像分人苦毒到當衰過樣仔；脣項個人做下緊看佢緊笑，教練緊拐佢，佢還係噉到抽骸、毋肯落水，高不將正喊阿媽同佢帶轉去。

該暗晡，阿爸軟聲勸話佢繼續去學泅水；阿媽就唉唉唧唧道嘆：「你毋去上課，學費就了忒哩，無好退！」阿哥也分享自家學泅水個經驗，還拿出佢盡愛惜個極樂仔講愛做佢學會泅水個獎

品。在大家個鼓勵之下，佢答應第二日愛過去上游泳課。

第二日朝晨，阿媽愛載佢去上游泳課，催了催佢還係啊啊奶奶³、這摸該摸毋肯停動。上課時間硬硬會赴毋著咧，阿媽發譴擊雞毛掃仔⁴愛修理佢，佢試著當委屈，又驚分阿媽打又驚去泅水，就噉到大嫵聲，歸條巷仔都聽到清清楚楚。鄰舍過來關心，知著佢係驚泅水正噉到恁大聲，做下忍等笑來鼓勵佢。就恁仔，該站時間，朝晨頭巷頭巷尾若係聽著佢又噉到噉噉滾⁵，就知該日佢又愛去上游泳課咧。

經過三禮拜個訓練，游泳課個同學一儕儕都學會泅也，同學一陣換了一陣，佢還係手同腳配合毋著，手記得划咧腳又毋記得踢，實在毋得結煞。有一日，佢自家在該練習，毋多知仔手同腳嘎配合得著哩，泅有五公尺恁遠，心肝肚實在還歡喜哪！佢續等過練，緊練緊知得該要領，手腳較省力哩，圓身也緊來緊輕鬆，佢正第一擺感受著泅水個趣味。

感謝該當時，屋下人個鼓勵，分驚水個佢面對自家個困難去學泅水，分佢有機會去克服自家較軟弱個所在，這下個佢，毋單淨曉得泅水哩，也有信心去面對人生個各種挑戰。

¹ 嚟：音 kieu^ˇ；小孩子對大人有所要求的聲音或動作。

² 沉：音 ciim；因外力所致而被推入、沒入水中。

³ 啊啊奶奶：音 a^ˊ a^ˊ nai^ˊ nai^ˊ；懶懶散散、愛理不理的樣子。

⁴ 雞毛掃仔：音 gie^ˊ mo^ˊ so^ˊ e^ˊ；雞毛撻子。

⁵ 噉噉滾：音 ve ve gun^ˋ；不斷的大叫或大哭。

110 年全國語文競賽客家語朗讀文章國中學生組（四縣腔）

編號 3 號

【拈田螺】郭亭好原作

當久毋識轉莊下，記得莊下个風特別涼、天特別青。熱天偌同老妹長間分烈烈个日頭逐去大樹下園，坐在阿爸用粗麻索編樹枋做个晃槓仔面頂，一儕擎一支涼沁沁仔个枝仔冰，冰緊舐、晃槓仔緊搖，涼凉个風吹等來，樹頂還有歸陣仔蟬仔¹在該「搵搵衣、搵搵衣」唱歌仔分偌兜聽。成半下在屋簷角，白頭烏佢兜也會來鬥鬧熱；毋驚人个膨尾鼠，也在樹頂頂舂上舂下、跳來跳去。

言讀書个偌同老妹歸日仔同阿公、阿婆共下寮，有一日阿公愛去巡田水，問講想愛跔佢去拈田螺無？好搞个偌跔等就應好，老妹也講愛跔。阿公蹶上半棚个閒間仔，搨出兩雙細水靴仔來分偌兜換，過拿兩頂鹹草帽分偌兜戴，佢自家也戴一頂大笠嫲。

阿公擎等鑊頭行頭前，偌同老妹一儕攞一隻細錫桶仔跔背尾，偌兜歸路仔啦歌哩曲當歡喜，阿公笑咪咪仔阿謔偌兜唱來當好聽，偌兜也風神到緊唱緊大聲。行到伯公下，脣項該搭平洋洋仔个禾頭田，就係阿公耕个田，阿公指等圳溝肚講：「你兜看，

這位就有田螺好拈咧，跔等這細圳溝仔改一路下，有當多田螺好拈哦！」阿公言講煞，老妹就好擲擲仔²先跳落圳溝肚開始拈也！

偌同老妹相拚仔看麼人拈較多，兩儕頭磬磬仔煞力牯緊拈，都驚分人逐過去，麼人也毋肯輸人。一下無堵好，老妹个水靴仔嘎潔在濫泥裡肚，水靴仔裡肚分濫泥塞滄也，老妹想愛掛泥同鞋擲起來，嘎仰仔都擲毋起來，還緊潔緊深，佢大聲喊偌過去同佢搵手，偌搭等厥大腳髀兩儕共下出力，結果鞋無擲起來，兩儕嘎跌到四腳惹天，搵到歸身仔浴潦合泥棍棍仔，連面也舞到像烏貓公个樣仔。阿公看著，遽遽行兼來同偌兜拉跔起來，過用手定定仔同老妹个水靴仔摟起來。阿公講：「你這兩個孤盲頭³，等下轉去，會害偌分若婆罵咧！」

驚分阿婆罵，轉到屋下偌兩儕偷偷囡囡趨入屋肚去，阿婆影著兩隻烏貓公轉來咧，好譴又好笑，喊偌兜遽遽去洗身，同一身烏疏疏仔个衫褲換下來。該載好性个阿婆無譴，毋過，還記得該日偌兜洗身洗當久，硬硬就會鑪忒一層皮咧，歸身仔都還略略仔臭泥羶，這下偌見看著田螺就會恹起這兜生趣个事情。

¹ 蟬仔：音 samˋ eˋ；蟬。

² 好擲擲仔：音 hau jied jied eˋ；興趣盎然的樣子。

³ 孤盲頭：音 goˋ moˋ teuˋ；在此為「好傢伙」的意思。

110 年全國語文競賽客家語朗讀文章國中學生組（四縣腔）

編號 4 號

【滿天星】李得福原作

來到屏東、姐公个菁仔園，裡肚一行行仔高天天个檳榔樹，聽講兩、三十年前，這位一分地一年做得收十過萬銀，還愛牽電火來掌菁仔。園仔裡肚係有火光，賊仔就毋敢來偷割哩，毋過今這下个菁仔無麼个價，正賣頭擺十分之一個價定定。雖然賣毋成錢，姐公還係打理到青柳柳仔，菁行中間還同佢種加兜仔時計果¹，也做得賣加一息仔錢。檳榔樹準柱頓²，利用廢電線來搭棚仔，有紅電線、烏電索、雙股个白片線，邊脣用白片線牽透龍，紅烏電線橫架直架刺³做三長過⁴个彩色時計果棚。

逐年个三月春分前後時計果開花咧，青花托撐等吊菜色个花，還有牽白鬚个花皮、副花帽；第二層係五皮青黃色个公花，合等⁵當貴个花粉；盡頂高係有三支像擰螺絲仔个扳手、又像豬仔个飯匙骨个，該就係嫵个花。佢識看過姐公擎一支毛筆，在每一蕊花頂高蘸蘸搵搵像畫圖樣仔，佢問姐公講：「阿公，你在該做

麼个？」佢指等花同佢講：「佢同公花个花粉蘸來膏在嫵花个花心頂，恁樣正會打子啊！」

棚仔頂吊到淦淦一粒粒仔青青个細果子仔，企在棚底下看往上⁶就像係滿天星斗，阿公講佢種个時計果品種就安到「滿天星」。佢兜就像係佢伸手就摸得著也摘得著、又七食得著个星仔呢！

清明過後無幾久，時計果就會轉烏黝紅，係講看啊去暗紅暗紅無青影个就做得摘咧。佢兜姊妹仔在棚仔下，臥頭一粒看過一粒定定仔相，相著係紅到轉烏色个就熟也，甜度罇擺較毋會酸。摘著有半菜籃仔就遽遽扛去倒入紙箱仔肚，一轉、兩轉、三轉同紙箱仔裝到淦淦，愛載轉高雄冰起來定定仔食。熱天放學轉，阿姆會同時計果洗淨，在蒂頭頂个外皮頂，挖⁷一隻像五十個銀恁大个空，放在水果盤頂，分佢兜拿細調羹仔定定仔舀來食。正摘啊著个時計果特別甜，佢一下去⁸就食忒七粒，酸藕酸藕緊食緊入味，連鼻公故出來个氣又七酸藕酸藕帶有時計果个味緒。

阿姆成時會同時計果裡肚个仁還過味挖出來，加一息仔冷滾水放入果汁機打，再過用盞仔裝好放冰箱冰，分佢兜準果汁啣。每擺係啣著這果汁，就會想著在果棚下煞猛做事，頭那毛蓬白、開容笑面个姐公。

¹ 時計果：音 to^ˇ kied so^ˋ；百香果，四縣腔語音源於日語「時計草」。

² 柱頓：音 cu^ˊ dun^ˋ；柱子。

³ 刺：音 qia^ˋ；以尖銳像針的東西扎入，織。

⁴ 三長過：音 sam^ˊ cong^ˋ go；超過三長列。

⁵ 合等：音 gag^ˋ den^ˋ；分配布置著。

⁶ 看往上：音 kon gong^ˊ song^ˊ；向上看。

⁷ 挖：音 va^ˊ；用手、工具掏取或掘取。

⁸ 一下去：音 id^ˋ ha hi；一下子。

110 年全國語文競賽客家語朗讀文章國中學生組（四縣腔）

編號 5 號

【畜羊仔个叔公】羅瑞霞原作

吾公有兩兄弟，偈兜歇莊項，叔公歇在離莊頭無幾遠个石礮¹脣，叔公無討舖娘，一儕人歇在礮脣，畜十過條个羊仔。叔公講：「一儕人過日仔較自由，又毋使愁勞博激，逐日快快樂樂過日仔，幾好吔！」

偈從細就好遊遊野野，講著搞就一條線，毋過平常時，愛上課、讀書，一日到暗就係國語、數學、英文、社會、電腦，搵到偈春頭磕額，頭暈腦疼，毋過一到放寮日，該就係吾个天下哩！

偈盡好去尋叔公寮，叔公个屋面前就係石礮，石礮脣有一大片个草坪，打早羊仔就在礮脣食草仔。偈見去到該位，係有看著羊仔在該食草，就會挑挑去逐該兜羊仔，總係同羊仔逐到咩～咩～緊叫，偈試著當生趣。該央時，叔公係在屋肚聽著羊仔叫，定著會行出來看，看著偈在該逐羊仔，就罵講：「孤盲牯，又在該逐羊仔咧！毋驚下二擺降个細人仔無屎肫。」

偈看著叔公出來，黏時喊一聲：「叔公，恁早！」叔公雖然會罵偈，毋過也盡惜偈，因為偈係屋下單單个孫仔。叔公笑面笑

面个行過來，緊行緊講：「羊仔肚屎枵吔在該食草仔，你莫撩佢，落來屋肚偈拿糖仔分你食。」講著有糖仔好食，這又也係偈好來叔公屋下个原因，叔公無家寶，一儕人歇，故所長透有好食个東西都會留起來，等寮日時節拿分偈食。

叔公雖然係一儕人歇，毋過屋下整理到淨淨俐俐，桌項無半點塵灰，完全看毋出佢係單身哥仔。偈識問過阿公，叔公仰會無討舖娘？阿公講：「頭擺叔公有熟識著一個歇在莊尾个細阿妹仔，該細妹仔生來麻筍麻筍，毋過異靚、異煞猛，兩儕感情也當好，兩家人也認定愛結親家咧。無想著有一日，該細妹仔在田肚做事，嘎分蛇哥咬著，該央時个醫藥毋發達，偈兜莊下堵著恁樣个事情，大部分都係自家尋青草仔捶捶貼貼啊，就好咧！哪會知，該細妹仔係分龜殼花咬著，無黏時送到街路去分西醫看，人嘎恁樣無忒吔。」該細妹仔無忒，對叔公个打擊當大，過後，叔公完全無愛摺其它个細妹仔相行，當多人愛同叔公做媒人，都分叔公拒絕忒，叔公就一儕人徙到礮脣去歇吔。

阿公講：「係有閒，你愛較輒啊去陪若叔公哦！」好啊！叔公恁惜偈，同佢做伴無問題啦！

¹ 石礮：音 sag bog^ˋ；石隄。

【放蝦公筍¹】郭亭好原作

拜六阿爸帶偌兜共下轉去莊下看阿公、阿婆。阿公看著偌兜轉來當歡喜，老妹盡使妮，一下仔就縱去插等阿公，講佢盡想阿公，聽著老妹嘴恁甜，阿公笑到哈哈滾。在灶下無閒个阿婆，聽著偌兜轉來，手項還擎等个鑊鏟赴毋掣放，就行等出來，手緊掌吾頭那，笑咪咪仔講：「兩儕做下較高也較作肉²哩！還好哪！」

當晝睡跣起來，偌看著阿公用白飯攪糠仔撚到一細團一細團仔放到蝦公筍裡肚，佢講等下愛去放筍仔。聽著愛「放筍仔」，偌試著異生趣就嚙³愛跣，頭下滿⁴阿公驚佢危險毋肯分偌去，偌緊同阿公保證偌會細義，高不將阿公正帶偌共下去。

河壩肚滿哪仔都係生溜苔个石頭，偌試著著等水靴仔行路當毋慣，行無兩步腳溜⁵一下險險跌倒，該載阿公手腳恁流掠，遽遽同偌揪等，佢講逐步腳都愛先試躡看啊，係毋會溜人正好躡上去。偌兜定定仔行到水較淺个位所，阿公教偌講，筍仔愛放在水

較恬又有石縫个所在，佢同水底个細砂石仔用手搵平來分筍仔做得貼地，過將筍嘴順等水流个方向，再尋一粒石頭砣在筍仔面，講恁仔筍仔正毋會分水打走，盡尾還愛在脣項个大石頭面項放幾粒仔細石頭做記號，恁仔收筍仔个時節正知筍仔放在哪位。偌兜順等河壩同蝦公筍放一路下，到天會暗咧，正做下放好勢。

第二日本來同阿公講好愛共下去收蝦公筍，偌嘎睡到日頭晒屎肫也都還言跣。阿公自家同筍仔做下收轉來咧，正喊偌跣床，湊偌共下來退蝦公筍。偌聽著阿公喊，煞煞跳跣起來，牙齒儘採鑪兩下仔就縱等出去同阿公搵手。逐隻筍仔裝著个東西做下無麼个共樣，退一隻筍仔就像開一到獎，有个裝著蝦公、細鯉仔，有个裝著毛蟹、石賓仔，成半下還會裝著湖鰵仔，實在還生趣！

這兜對鮮鮮河壩水肚來个好食材，在阿婆个好手路料理之下，當晝歸桌仔又萋又好食个魚仔、蝦公，還有阿婆種个萋萋个青菜，十分豐沛！飯桌項偌兜緊食飯緊講笑，歡喜个心情試著逐樣都恁好食。臨暗仔偌兜愛轉也，車仔正駛停動，偌就遽遽同窗門撇下來，大聲喊講：「阿公！另擺係愛去放蝦公筍个時節，定著愛記得帶偌共下去哦！」阿公緊搵手，頭那緊領緊應：「好！」

¹ 蝦公筍：音 haˋ gungˋ hoˋ；竹製的捕蝦器具。

² 作肉：音 zogˋ ngiugˋ；長肉、生肉。

³ 嚙：音 kieuˋ；小孩子對大人有所要求的聲音或動作。

⁴ 頭下滿：音 teuˋ ha manˋ；一開始、第一次。

⁵ 溜：音 tiu；滑動、滑落。

【大樹下】謝玉賢原作

記得佢還係細人仔個時節，屋面前有一條細河壩，河壩肚輒常會看著幾下隻鴨仔，在該泗上泗下，成時佢兜細人仔也會跳落水肚，同鴨仔共下搞水，你辱佢，佢辱你，搞到一身溼漉漉仔正轉屋。毋過，分佢印象最深个毋係該條細河壩，係河壩脣个該頭大樹。

該頭大樹，厥个名仔安到爛布樹，樹中央係空心个，毋過佢當耐命。逐年正開始熱，樹葉仔會跌到滿地泥，四叔就會蹶到樹頂，撈樹把¹剝到淨淨，毋使幾久，爛布樹又會綻筍，新樹把一支支仔，樹葉仔生到撈撈，大樹底下就係大家唱歌仔寮涼个好所在，也係細人仔搞寮个好地方。

大樹下長透坐一大堆个人，逐儕都擎等一支扇仔撥啊撥欸，在該打嘴鼓。人講「七個和尚八樣腔²」，下屋个阿真叔講厥俵仔愛做兵哩，愁到無結煞，愁佢做兵毋知會分人欺負無？愁到目汁強強會跌下來哩！上屋个叔姆，講厥妹仔下禮拜愛嫁人，喊大家

去分佢請，問大家佢兜人嫁妹仔有麼个俗無？愛砣男家頭麼个？糞耙仔愛打幾多斤？扇仔愛喊麼儕拈？帶路雞愛幾多隻？雖然有一大堆个問題，毋過叔姆還係當歡喜，暢到牙西西仔³。吾姆乜輸人毋輸陣，同大家講：「吾妹仔考著師專哩，等佢畢業就做得做先生，搵手賺錢哩！」大家你一句佢一句鬧熱煎煎仔⁴，有人愁也有人笑，實在異生趣。

大樹下，這片大人在該打嘴鼓，該片个細人仔乜無閒到講毋得，細妹仔在大樹下搞份家啦，你做爺仔佢做哀，爛布子秦起來做戩鍊、石頭結起來做烘爐、樹葉仔做青菜、樹把截仔做篾仔，大家搞到盡歡喜；細俵仔就在該搞園人尋、打紙牌，有兜人搞玻璃珠仔，有兜人灌土狗仔。這兜綻剝頭⁵，逐個精砣砣仔⁶，看著一團鬆泥就知下背有土狗仔，七手八腳搵泥、攞水、倒水，毋使幾久土狗仔就走出來哩，這陣細人仔長透搞到愛大人擎等竹修仔來尋正肯轉屋，實在異有好搞。

大樹下有佢當多个回憶，係隔壁鄰舍聯絡感情个所在，也係細人仔搞寮个地方。雖然童年離佢當遠哩，毋過童年个記憶還像昨晡日樣仔。該頭根深葉靚个爛布樹，就像係一支大大支个遮仔，保護佢兜行過艱難又辛苦个日仔，該頭堅韌又耐命个大樹，到這下還係佢回想人生个中心寄託。

¹ 樹把：音 su pa`；樹枝。

² 七個和尚八樣腔：音 qid` ge vo` song bad` iong kiong`；形容人多口雜，主張不一致，各有各的說法。

³ 牙西西仔：音 nga` xi` xi` e`；牙齒微露，輕鬆愉快的微笑。

⁴ 鬧熱煎煎仔：音 nau ngied jien` jien` e`；形容非常熱鬧的樣子。

⁵ 綻剝頭：音 can dog teu`；罵人頑皮鬼。

⁶ 精砣砣仔：音 jin` guag guag e`；精明的樣子。

編號 8 號

【該條大崎】黃美貞原作

歇在伙房个人家，出出入入定著愛經過大崎，頭擺該位仔有種一大片个香絲樹，故所大崎又安到「香絲坪」。對細人仔來講，去讀書愛蹶該條大崎斯異難耐¹，毋過日仔總愛過，香絲坪也變大家人生活个一部分，佢盡記得个就係同阿雪溜大崎，無擋仔該件事情。

上屋个阿雪大佢三歲，五年生該下，就自家箭自行車去讀書，上大崎該下，愛企等煞猛牯箭，箭毋贏正甘願下來用牽，書包仔放在面前个籃仔項，看起來風神哎哎²，該央時，細人伴仔都當欽羨佢。有一擺，佢在大崎頂堵著阿雪，佢講：「佢載你下崎愛無？」佢想著阿姆个叮嚀，心肚唉唉唧唧³，就講：「毋使，毋使！佢自家行轉去就好哩。」阿雪恃夠夠⁴講：「佢日日就溜啊轉，又遽又暢快，還過擋線正換新个，愁麼个？」佢用手試撚啊，車仔黏時就頓恬⁵，看起來異妥當，胚想試一擺就好，阿姆毋

¹ 難耐：音 nan^ˇ ngai；指事情艱難不容易。

² 風神哎哎：音 fung^ˊ siin^ˇ ngai ngai；洋洋得意。

³ 唉唉唧唧：音 ai^ˊ ai^ˊ jid jid；哀聲嘆氣的樣子。

⁴ 恃夠夠：音 sii gieu gieu；自信滿滿。

⁵ 頓恬：音 dun^ˋ diam^ˊ；停止。

會知啦！

跋上車，在崎頂看啊下，阿姆哀！腳底撓撓，雞嫵皮緊起，阿雪講：「你會驚係無？」佢毋擔輸贏應佢：「有麼个好驚？」其實佢驚到會死又毋敢講。阿雪吩咐佢扳好來，佢兩隻手揪等阿雪个衫，兩粒目珠眨到緼緼，車仔順順仔溜下去，聽著唧唧欵个擋仔聲，心肝加異定貼，按算加一下仔就到哩。無想著，溜到半崎个時節，擋仔嘎恬忒，這時節，阿雪開聲喊：「無擋仔咧！這擺就死無命哩！」佢毋知愛仰結煞正好，就跔等阿雪緊喊。

砰聲仔！車仔對對去撞著一墩笏竹，吾目珠擘啊開來，看著阿雪橫在竹頭下，企毋起來，緊噉緊呻：「還痛！還痛哦！」佢摸一下溼溼个鼻公，手巴掌全係血，原來係出鼻旺仔哩，該載手脚還做得停動。佢定定仔跋跣起來，顧毋得歸鼻公个血，一路行轉去伙房尋人，好得阿泉叔兩子爺堵好轉夜，奧多拜正熄火，擎起廳下个藤椅，跋脚就去同阿雪扛轉屋下，遽遽打電話請莊頭个魏先生來看。阿雪也命靚，淨手脚鑪溜皮定定，毋過可能係嚇著咁，暗晡頭緊發狂⁶，食睡毋得，厥婆還帶佢去陂塘下恩主公收驚。

該擺溜大崎逞英雄个事情，一下恹起來，心肝窟還會掣一下，雞嫵皮又膨膨起咧！

⁶ 發狂：音 bod^ˋ kong^ˇ；失去理性，舉止狂烈、異常。